

بتستعجب !!!

تفتكر أنا ممكن أحلم

رغم إني مش بنام

تفتكر قلبي هيسلّم

من عتابه والملام

تفتكر ممكن أفوق ..

وأرمي ع الدنيا السلام

لسه من كام يوم وعدوا

سبت قلبي ف الطريق

حتي ما حاولتش أساعده

أو أدله ع الصديق

لجل ما ينور له ليله

يسنده لو كان ف ضيق
تفتكر أنا ممكن انسي
جرح قطع لي الوريد
ولا قبضة روح بتقسي
ولا حب وكان .. عنيد
تفتكر ممكن أسامح
وابتدي بنهار جديد
تفتكر انا ممكن أفرح
والوجع يبعد يروح
بين ضلوعي الورد يطرح
والحنين مفيهوش جروح
تفتكر ينفع أروق ...
تنطق الاحلام ... تبوح
تفتكر ممكن أعود

عاشقة روعي والصمود
يرقص القمر اللي طائل
تشرق الشمس بوعود
احضن الحب اللي هائل
والحياة ترجع تجود
تفتكر أنا ممكن أحلم
رغم اني مش بنام
والليالي لما تطول
تيجي بالشوق والغرام
تفتكر أنا ممكن أنسي
ولا أرجع تاني أندم ..
تبقي عيشة والسلام
تفتكر؟؟